

Tge è tut service public?

■ **(anr) Suentar il stretg gea a la nova lescha da radio e televisiun è la discussiun davart il service public lantschada en Svizra. Mo quel è bler dpli che sulet ils programs da la SSR/SRG.** Perquai pretenda l'Associaziun da las vischnancas svizras in service public d'auta qualitat per l'entira Svizra. Quai ha il president da l'associaziun numnada, cuss. dals chantuns *Hannes Germann*, constatà a chaschun da la radunanza generala a Berna.

In bun service public pussibilitesch bainstanza e qualitat da viver er en re-

giuns periferas. Segund il parsura da l'Associaziun da vischnancas svizras duajan vischnancas, chantuns ed interpresas vegnir rinforzads e sustegnids tras la politica en lur incarica dal provediment da basa. L'associaziun da vischnancas vegnia a cuntinuar cun quella discussiun davart il provediment da basa cun tuts pertutgads e fixar furmas da dimensiun e pensums dal service public tant sco pussaivel en il senn da las vischnancas.

«La Posta stettia entiramain tar il service public.» Quai ha constatà *Franz*

Huber, manader dals uffizis postals e vendita tar la Posta. Ella adempleschia l'incarica dal provediment da basa tenor las prescripziuns dal cussegl federal – e quai en auta qualitat. Quai ha era la Postcom, l'istanza da surveglianza, confermà. Mo ils basegns (pretensiuns) da la clientella sajan sa midads. La Posta vegnia perquai a preparar en l'avegnir sia rait en dialog cun las autoritads pertutgadas. Malgrà tut quai ch'ins audia hajan las novas furmas da la purschida – sco agentura e servetsch chasan – chattà gronda acceptanza tar la clientella.